

四庫全書

史部

欽定四庫全書

史部

世宗憲皇帝上諭旗務議覆卷九至十二

詳校官左都御史_臣李紱

編修_臣袁謙覆勘

總校官知縣_臣楊懋珩

校對官助教_臣卜維吉

謄錄監生_臣袁瑩

欽定四庫全書

世宗憲皇帝上諭旗務議覆卷九

上諭我國家膺圖受命則有佐命元臣際會風雲開拓疆宇至於承平之世亦有勞臣宣力綏靖不庭凡厥鴻猷駭列焜耀旗常於是酬庸獎功賜以公爵其中分為一等至二等三等所以第其勳勞表其閎闊同於古者河山帶礪之盟爰及苗裔永久勿替甚盛典也朕考古封爵之制漢唐以來公侯皆係以郡縣之名而漢世功名

顯著者則加以美號如信武冠軍建忠定遠之屬並以
榮名垂光史冊本朝封王者皆選用嘉美字樣其嗣王
襲封則因之而公爵則但分等次未有封號字樣朕意
欲考其當日勲庸錫以嘉名追加為某公使勲勞之臣
顯功丕績常赫赫在人耳目間而其子孫承襲封號亦
皆顧名思義共加奮勉世為國家効忠抒力期踵美前
人之光以副朕褒念勲舊之至意至於宗室外戚則倣
古恩澤侯之例命為奉恩公或承恩公以昭寵錫其如

何命名定制并將歷來功臣勲戚加錫美號之處著該部詳查定議具奏特諭

禮部議覆恭惟我

國家誕膺

天命撫綏兆民六服承德萬年鞏固其間佐命元勳承平良弼固已第其勲勞

錫之公爵分為一二三等以示褒榮我

皇上篤念勲舊更加追獎聿稽懋績

錫予嘉名至宗室外戚亦倣古制以昭

寵錫令臣等詳查定議具奏仰見我

皇上崇德褒功優渥加隆之至意本

朝定鼎以來魁傑竒英後先彪炳鴻猷駿烈焜耀旗常
既列公爵以酬庸爰及苗裔而勿替誠宜考其平生
之實蹟加以顯榮之美名臣等竊以佐命之臣開疆
拓宇者則倣漢之信武建忠奉義建策唐之翼國者
國宋之福國元之忠武壽國明之雄武靖寧等名於

承平之世宣勞盡力者則做漢之冠軍壯武富民褒
德唐之安國宋之崇國成國元之寧國定國明之崇
信忠勤等名各擬美名務期至當凡厥後嗣咸襲嘉
稱既榮號之攸分自先猷之儼在仍以原封一等二
等三等字樣冠於美名之上至於宗室等公伏查我
朝定制原有鎮國輔國等爵應加封為奉恩公其外戚
等公則做漢之平恩侯宣恩侯等名命為承恩公兼
總前代肇錫之嘉名特著本

朝加封之盛軌禮以義起名與實符庶使豐功偉績垂
竹帛以常新亦令勲裔世臣偕河山而永奠顧名思
義益勵臣忠効力抒誠長霑

聖澤謹將現今襲封一二三等公十員照伊等先世受封
之年分開列名單恭擬美名呈

覽伏候

欽定仍以原封一二三等冠於美名之上給與始封襲封
之員其宗室公等封為奉恩公外戚公等封為承恩

公一併給與

誥命

奏入於雍正九年三月二十五日奉

旨一等公圖海定為忠達公一等公賴塔為褒績公三等公恩額德禮為奉義公一等公鄂拜為超武公一等公圖賴為雄勇公二等公圖爾格為果毅公三等公蜚英東為信勇公三等公多尼庫魯克為建烈公三等公和朔圖為勇勤公一等公揚武裡為英誠公

散秩大臣尚崇廩查明教場倒塌官房具奏奉

上諭朕從前為此營房屢降諭旨八旗大臣等緣何至今
尚未修理今尚崇廩查明奏稱請將鑲黃等四旗都統
等交該部察議其倒塌營房動用官房租銀每旗派委
能員二人監修等語都統等不必交部其應修倒塌之
房將該旗都統等養廉銀修理監修之員任伊等酌量
派委察旗侍衛官員等所司何事如此事件伊等為何
不行查奏著稽察上諭處大臣等詢問伊等從前若有

查奏之處則已如並未查奏將伊等交該部察議此事亦著議奏特諭

稽察

上諭處大臣等議覆八旗營房一事都統等遲至二年尚未具奏亦無修理乃察旗侍衛官員等並無催令辦理又未奏

聞殊屬不合除將侍衛官員等交部察議外應令各旗大臣等用養廉銀兩將倒塌營房及官學速為修理其

監修官員令伊等酌量派委鑲黃等四旗現有房屋已數兵丁居住其缺少房屋應如尚崇廩所奏無庸重造其撥給甲喇佐領而餘剩之房及該佐領內無人居住而空閒之房本人領得而賃與人住之房俱如所奏查給無房兵丁居住其私蓋小房賃與民人開舖者應如所奏准賣油鹽等物外有賣酒者著嚴行禁止至於修築圍牆置備木版等項輪替守柵夜間巡邏造具住房人名清冊及嗣後有應行修理官

房即著住房人修理等處俱如所奏交與八旗都統等畫一辦理再八旗每甲喇或護軍校或驍騎校酌派一員令住營房協同管營房章京一同管轄

奏入於雍正九年四月三十日奉

旨依議

上諭據御史王壯奏稱京師春初米價稍昂蒙恩軫念民食特諭五城添設米廠減價糶賣羣黎無不均沾聖澤但定例五城糶米槩用錢文交貯戶部目下錢價雖未

高昂祇恐將來錢文積聚必至價昂查戶部每月給放
兵丁錢糧原有一九二八搭放錢文之例今可否於定
例搭放之外暫增分數將五城交貯之錢配入搭放俟
米廠停止仍照前例等語錢文乃民間日用必需之物
向以價值昂貴屢厯

皇考聖心數年以來朕備極焦勞所以為便民利用籌畫經
理者亦殫竭心思矣惟是欲價值之得平若遠繩以官
法又恐有生事滋擾之弊此亦天下所共知者目今發

米平糶以濟民食而交納錢文者本是便民之意今王
和又稱收錢既多則錢價必致漸長此亦事之所有不
可不慮及者朕思錢價之不能平減者因兌換之柄操
於舖戶之手而官府不司其事是以小人圖利得任意
多取以便其私耳今若照五城減價糶米之道將搭放
兵餉之錢文著八旗於五城各設一局兌換與民照舖
戶之數多換數十文至銀一兩換錢一千文為率如此
則錢價之貴不待禁約自然平減於民用似有裨益著

九卿悉心定議具奏特諭

九卿等議覆制錢之設本為有便於生民必使價值得平然後於日用有益查京師錢鋪內其逐日所定錢價之低昂率以經紀之所定為準大抵錢少則價值必增此際牙行經紀或任意行奸或因一應鋪戶內將錢文收貯不肯出換其弊種種不一以致錢價昂貴臣等前議除每月支放兵餉將銀錢一九二八搭放外再將賣米之錢增數搭放今

皇上以糶賣之米既多則錢價或至昂貴

特諭八旗於五城將搭放兵餉之錢設立錢局較民舖每兩多換錢數十文則不煩禁約而錢價自然得平此誠默運流通裨益民生之妙用也查戶部庫內現今收貯錢文六萬餘貫寶泉局內現今收貯錢文八萬餘貫再五城十局內自正月至三月糶賣米石錢文六萬二千六百餘貫將此項錢文遵依

諭旨著八旗於五城各設一局交該旗都察院派員管理

俟選得官房設立錢鋪之時即將戶部庫寶泉局收貯搭放兵丁錢糧之錢文由戶部每鋪支給五十貫俟兌換完時再支給五十貫又查京師錢鋪內俱用市平市平較庫平每兩短三分六釐今民間以九九色銀每兩換錢九百五十文若較之庫平及十足銀每兩換錢一千文似屬無多臣等愚見以為既係市平換錢即照市平交庫則換錢之人既皆歡悅而管理之官員亦不致有瞻顧矣倘有積惡牙行及一應

貿易舖戶將錢文積聚不行出賣或將錢文數十百貫以車載往城外遠處販賣者令提督衙門府尹等處緝拏治罪如此則一應舖戶所得之錢文即行出賣不敢積聚而牙行經紀亦不致任意為低昂矣

奏入奉

旨依議但八旗各設立錢舖若不得實心管理之人於民生亦屬無益現今八旗米局俱係揀選官員管理其換錢之處應否交米局內辦理之處著八旗大臣等議奏

欽此辦理旗務王大臣等議覆制錢於民生日用最為
緊要因欲錢價得平

特降諭旨令九卿悉心詳議具奏又

勅令八旗大臣等將換錢之事應否交米局內辦理之處
議奏仰見

皇上軫念兵民生計詳加籌畫至矣極矣查八旗滿洲蒙
古漢軍共二十四米局每旗特派大臣一員管理又
於叅領驍騎校領催馬甲內擇其有品行實心効力

者派令管理今設立錢鋪之處若另選官房派人管理既需時日事亦不無遲悞請將換錢之事即交管八旗二十四米局之大臣官員辦理其民間換錢之銀兩成色不一每局將識認銀水之人僱一名使用其由部運錢到鋪之腳價及僱人之工價俱由米局滋生之利息內動用支給用過數目彙入年底奏銷再查市平錢其輕重不一請每局由部內領取市平錢各一以備換錢交銀之用若平錢有輕重錢數有

多寡等弊將失察之大臣官員一併議處此外俱照
九卿議定遵行

奏入於雍正九年五月初七日奉

旨依議

上諭內府佐領下每旗酌量增挑護軍或一百名或二百
名設立烏鎗營其作何操演及應給錢糧米石之處著
莊親王內務府總管等會同大學士蔣廷錫及辦理軍
需大臣等詳悉妥議具奏特諭

莊親王允祿等議覆查內府三旗每旗護軍各二百名分旗值班一日用一百四十四名其餘五十六名在跟隨導引管轄等雜差上行走現今高麗二佐領及各佐領渾托和有烏鎗馬甲六百名惟護軍營並無烏鎗茲為增挑護軍設烏鎗營所降

諭旨甚屬周詳請每旗增挑護軍二百名於各佐領渾托和下馬甲內擇其人材射箭可觀者挑取如或不敷於閒散人內挑取合新挑護軍與舊挑護軍內共挑六百

名為烏鎗護軍伊等初學烏鎗又兼習馬步箭應將差役減少俾得有暇學習其教習烏鎗行文火器營令其派人教習俟習熟時仍令回原處行走今既另設烏鎗營每旗應添設護軍叅領各二員侍衛委署護軍叅領各二員護軍校委署護軍叅領各五員護軍校各十五員其護軍叅領員缺由驍騎營叅領內揀選帶領引

見補授令其兼攝其委署護軍叅領及護軍校等照例揀

選引

見補授於護軍內每旗放副護軍校各五員如有應用驍
騎營官員之處酌量添取令其兼攝其總統之員將內
務府總管等職名開列奏請派委其協理之員由內
府三旗護軍統領內奏請派委一員其應用烏鎗交
養心殿製造處造給其火藥鉛子等項向該部取用查
從前所有烏鎗馬甲惟演習打牌並不演習連環等
法此項新設烏鎗護軍亦令學習連環等法再從前
所有護軍六百名並未按佐領渾托和派定數目今

又添設六百名共有一千二百名嗣後應按佐領渾托和派定數目滿洲佐領高麗佐領每一佐領下派定二十五名旗鼓佐領每一佐領下派定十九名所餘十七佐領每一佐領下派定十八名三十渾托和下每一渾托和派定護軍各一半嗣後挑取護軍時如本佐領渾托和下無應挑之人即由別佐領渾托和下挑取如本佐領渾托和內護軍缺至五名以上者將該佐領管領交該處察議

奏入於雍正九年八月二十一日奉

旨依議

上諭近見蒙古旗分人能蒙古語言繙譯者甚少沿習日久則蒙古語言文字必漸至廢棄應照考試清文繙譯例考試蒙古文繙譯取中生員舉人進士以備理藩院之用如有學習漢書願就試漢文者照常准其考試於別部院補用如此則蒙古旗分之人益加鼓勵勤學蒙古語言文字不至廢棄而理藩院亦收得人之效矣著

內閣會同理藩院議奏特諭

內閣會同理藩院議覆制科取士乃

國家之盛典我

皇上加意作人

特降諭旨命將八旗蒙古內能蒙古文繙譯者另定額考

取此誠

皇上造就人材以裨益庶政之至意也臣等請將八旗蒙

古旗分內能蒙古文繙譯者照考試清文繙譯之例

三年內考取生員二次舉人一次進士一次其考試
蒙古文舉人進士與考試清文舉人進士合為一次
令滿洲旗分考試之人坐東號房蒙古旗分考試之
人坐西號房取中後將滿洲蒙古各為一榜一同懸
掛其考試生員派蒙古提督學政一員考試舉人進
士派蒙古正主考一員蒙古同考官二員俱由該衙
門行取各部院蒙古大臣官員職名開列具奏恭候
欽點其考試生員題目於清字日講四書內視漢文至三

百字為准出題一道令其以蒙古文繙譯其考試舉人進士題目於清字日講四書內視漢文至三百字為准出一道為首題又出清字奏疏一道為次題其二道令其以蒙古文繙譯其謄錄試卷派用各衙門能寫蒙古字筆帖式其監臨提調監試等官於考試清文繙譯已奉

旨派出無庸另派其應取生員舉人進士之數著考試官擇應取試卷併擇備卷數本奏請

欽定

奏入於雍正九年八月二十四日奉

旨依議

上諭設立米局一事並非有人條奏原出朕之本意為有益兵丁起見迄今三年看來米價平穩實為有益此旗民所共知者今若不問素日辦理何如但以滋生利息多者議叙則將來必開營利之端殊失朕之本意未為妥協應查自設立米局以來大臣官員未經更換並無

辦理失宜曾經叅處事故者列入優等議叙方為得宜此議著察旗侍衛叅領逐一查明後著弘春石文焜鄂齊趙弘濟等再加詳查會同八旗大臣公議具奏特諭多羅貝勒弘春等議覆臣等會同八旗都統副都統等查得辦理米局之大臣官員內除曾經叅處之十二旗并辦理中平之七旗及通州米局曾經叅處之右翼辦理中平之左翼均無庸議外所有自設立米局以來大臣官員未經更換並無辦理失宜亦無叅

處事故之五旗相應遵

旨奏明交部議叙以示獎勵俾將來接管之人各知鼓舞
效法仰體我

皇上惠養軍民之至意其應行議叙之旗分大臣官員職
名分別等次繕摺恭呈

御覽

奏入於雍正九年十二月初二日奉

旨交部議叙

世宗憲皇帝上諭旗務議覆卷九

欽定四庫全書

世宗憲皇帝上諭旗務議覆卷十

上諭察哈爾地方總管副總管辦事官員之缺因本處無
應補授之人始於京城蒙古旗分官員內揀選補授伊
等俱係由護軍披甲出身之人口外遊牧之地並無產
業艱於為生故常向所屬人等索取些微財物妄行侵
刻以致被人控告及被監察官員糾叅若將伊等即照
貪婪例治罪稍有可原嗣後察哈爾地方總管副總管

辦事官員由京城補授遣往者作何施恩賞給伊等產業牲畜之處著大學士鄂爾泰等議奏特諭

大學士鄂爾泰等議覆察哈爾地方總管副總管辦事官員等向以貪污之故被人控告糾叅者甚多仰蒙

皇上洞鑒伊等俱係由京城補授遣往人員無產業牲畜難以為生不得已向所屬人等索取財物妄行侵刻致干罪戾我

皇上特沛恩膏

諭令議給賞賜 臣等謹議得察哈爾地方八旗由京城補授之總管賞給蒙古帳房四架駱馬九匹騶馬一匹牝牛九頭牴牛一頭羊八十隻副總管賞給蒙古帳房三架駱馬七匹騶馬一匹牝牛七頭牴牛一頭羊六十隻辦事官員賞給蒙古帳房二架駱馬五匹騶馬一匹牝牛五頭牴牛一頭羊四十隻此應給蒙古帳房著該部每架折給銀六兩其馬匹牛羊著張家

口馬羣牛羊羣總管撥給今伊等蒙

皇上洪恩各得孳生牲畜嗣後如伊等仍有需索屬下人等之事或經查出或被首告一經審實將給過牲畜俱行追回從重治罪

奏入於雍正十年二月初九日奉

旨依議

上諭圓明園官兵應廣其陞遷之路增補官員其如何增補之處著果親王等議奏特諭

果親王允禮等議覆查得現今

圓明園每旗營總各一員副護軍叅領各三員護軍校
委署叅領各四員護軍校各十員副護軍校各九員
今奉

特旨增補官員請於八旗現有之副護軍叅領十六員內
每旗揀選一員補授護軍叅領令其次營總辦事伊
等員缺於護軍校委署叅領內揀選補授查護軍叅
領俱係正三品副護軍叅領係五品今蒙

聖恩廣伊等陞遷之路將副叅領准為四品其護軍校委署叅領之缺於護軍校內揀選補授亦令戴孔雀翎准為五品每旗增補護軍校四員副護軍校五員合舊有者共各為十四員每甲喇各為二員再內府三旗護軍叅領共三員於伊等內補授營總一員查內府護軍叅領係五品今將補授之營總准為四品令掌管關防其員缺增補護軍叅領一員再隨關防之筆帖式每旗挑補四名仍令食護軍錢糧內府三旗

亦令挑補筆帖式各四名如此則叅領護軍校等陞
遷之路既廣而護軍等之陞遷亦速矣

奏入於雍正十年四月初一日奉

旨依議

上諭圓明園兵丁朕從前未經細看此次朕往觀大閱細
看沿途站立管道之圓明園兵丁氣象較前甚優圓明
園之八旗及內府三旗賞給教習令伊等子弟學習漢
書著果親王等議奏特諭

果親王允禮等議覆八旗及內府三旗營房向因地勢建造故相隔遠近不一今蒙

聖恩設立學舍當視營房之遠近建造查得鑲黃正黃正白鑲白此四旗營房相近應造學舍一所設教習二名正紅鑲紅此二旗營房相近應造學舍一所設教習一名正藍鑲藍此二旗營房相隔甚遠不便設立一學每旗各應造學舍一所各設教習一名其內府三旗既同一營房應造學舍一所設教習一名共造

學舍五所挑取教習六名其教習於八旗及內府生員內擇其能訓誨者六名令為教習著四年一換每月給伊等錢糧二兩每年三季共給米二十一斛二斗其中如有善於教訓誠屬優等者咨行吏部即以筆帖式補用其平常者駁回該旗其教誨甚劣者將生員革退其缺另行挑取

奏入於雍正十年四月二十七日奉

旨依議

上諭附近京畿之小城駐防滿洲兵丁俱係協領官員等管轄因無總管之大臣故教訓兵丁稽察官員之事殊為踈忽雖在地方妄行生事亦無約束之人應交相近居住之大臣令其兼管附近

陵寢者即交

陵寢處大臣等管轄附近天津者即交天津都統管轄若相近無有大臣居住之處由京城內特派大臣一員令其總理每年前往稽察一次則官兵自然奮勉遵奉法度

在地方不致有妄行生事之人矣著大學士鄂爾泰詳
察議奏特諭

大學士鄂爾泰議覆查喜峰口冷口羅文峪俱與

陵寢相近將此三處駐防官兵即交

陵寢處大臣等稽察管轄三河縣玉田縣順義縣永平府係

解送犯人直達山海關之大路將此四處駐防官兵

即交山海關總管稽察管轄滄州地方與天津相近

將此駐防官兵即交天津水師營都統稽察管轄德

州為山東所屬地方係往青州便路將德州駐防官兵即就近交青州將軍稽察管轄獨石口古北口張家口錢家店鄭家莊昌平州此六處係一路寶坻縣固安縣雄縣霸州彩峪保定府良鄉縣東安縣此八處係一路俱無可交兼管之處應由京城派副都統各一員令其總理稽察其派副都統之處著兵部開列副都統等職名具奏

欽點二員每年秋季令其前往將各處駐防官兵稽察閱

看馬步射優者獎勵劣者懲責務令各加勤學技藝
安靜守分不許在地方生事其官員之優劣亦令分
別具奏此派出之副都統前往稽察之時照例給與
官馬行糧

奏入於雍正十年五月十六日奉

旨依議

上諭凡官員議處之案多係本任然亦有年久而後發覺
或逾年而後結案者乃該員已經陞遷方行議處如在

外州縣陞至道府在內司官陞至堂官遇原任內有應
行議處事件仍照原任品級處分係向來相沿之舊例
如此但伊等所犯之案情有重輕如尋常窒誤事件亦
照原任品級處分似於情理未為允協況此等人員久
經歷任既得陞遷其材必有可用如因原任事發悉照
原品降調畧無差等殊非愛惜人才之意著該部悉心
詳酌作何分別定議具奏特諭

吏部議覆查官員陞任後如遇原任事發應行議處

者其品級既有大小之不同且原任發覺案件情罪亦有輕重之不一若事發之日不論情罪輕重一槩從原任降調誠未允協今欽奉

諭旨令臣等分別定議仰見我

皇上睿慮周詳愛惜人才之至意臣等細加酌議請嗣後凡内外文武官員陞任之後遇原任事發應行降調者如係貪贓酷刑營私作弊等案內情罪重大者俱仍應於原任內議以降調其餘一切尋常窒誤事件

情罪尚輕俱於現任內議以降調如此則處分更得其平而陞任各員益加奮勉矣恭候

命下之日載入例冊以便遵行

奏入於雍正十年六月初二日奉

旨依議

上諭八旗及外省之出征護軍叅領協領以下驍騎校以上等官俱以漢仗好揀選派往之員故將現出各缺俱委員署理俟伊等凱旋之日一併揀選補授今軍務尚

未安定伊等身在軍前行走勞苦反不得陞遷朕心深
為憫念嗣後應陞副都統之出征叅領協領等官內該
管大臣如有深知者將其人材可用効力行走之處詳
細聲明保送兵部俟副都統缺出列名具奏再副護軍
叅領以下驍騎校護軍校以上各缺應將出征人員作
何補授之處著大學士鄂爾泰等確議具奏特諭

大學士鄂爾泰等議覆

皇上屢念出征人員恐其陞路壅滯令臣等議奏乃我

皇上至仁之意現今八旗應陞副都統人員內各該大臣等有深知者即保送兵部列名具奏外查八旗出征人員俱視其漢仗好者派往若伊等應陞缺出理應補授但伊等自出征以來有無効力之處在京之大臣等無由得知應令各該都統副都統及駐防將軍等將所轄派往出征之官員行查軍前令將軍等將伊等効力行走之處查明據實出具考語咨覆到日各該處註冊如伊等應陞缺出該大臣等秉公與在

京應陞官員一併列名具奏補授若補授出征之人其缺仍著署理俟回京時補行引

見再軍前人員內如果有効力之處人去得者該將軍等亦聲明咨送該處註冊其驍騎校護軍校等缺出各該管大臣等亦照官員之例奏明補授其缺照常署理如此則出征并在京官員陞遷之路俱不得壅滯矣俟

命下之日交兵部徧行各該處

奏入於雍正十年七月初九日奉

旨依議

八旗都統等將八旗兵丁當差之處裁減具奏奉

上諭此所奏摺內看守倉庫及禮部金冊等處所需兵丁甚多現今正值操演之時兵丁等看守之處太多必致有悞操演嗣後倉庫等處如何另行派人看守之處著八旗六部及倉場衙門大臣等公同詳議具奏特諭

八旗六部倉場衙門大臣等議覆查看守倉庫俱係

八旗馬甲理應撤回以便操演請於八旗滿洲蒙古漢軍內或間散人或養子開檔人及官兵之家下陳人內擇其壯健者挑取二千二十四名令其看守照步甲之例給與錢糧米石分為二班專令看守倉庫等處其中有應挑取護軍馬甲者照常挑取此項兵丁專為看守而設不必給與盔甲各倉庫之處現有官給弓箭撒袋亦無庸另給其腰刀照官價折給銀兩其銀兩即動用各旗所貯官房租銀交各佐領置

辦動用銀數令各旗於年底奏銷管轄此項兵丁除八旗所派操演官員外所餘官員內每旗滿洲蒙古漢軍合派十員共選八十員再於降級革職官員內揀選一百二十人共為二百員令其管轄此所選降革人員每人每月給與銀三兩米二石降級之員照伊所降品級戴頂外革職人員請給與八品帽頂以便管轄若看守行走五年無過令各該旗大臣等於伊等應陞之缺列名如不勉力行走令其叅奏從重

治罪俟大兵凱旋之日將此項所添之兵缺出不補
此項人員令各該旗大臣等將好者揀選於應陞之
缺奏請補授如此則看守之處既得專人而操演兵
丁亦不致有悞矣具奏奉

旨看守倉庫所添降調革職人員俱係本身犯罪降革之
人所犯之罪輕重不等其中亦有人去得者大槩無用
者居多若有用之人惟令看守此等處所似覺可惜若
無用之人令其看守倉庫緊要之地反於事無益爾等

理應加意選擇務期得人將伊等分作兩次帶領引見再爾等奏稱所選廢員若不勉力行走即從重治罪並未議定如何治罪伊等若仍不悛改不肯實心効力如何從重治罪之處爾等定議具奏餘依議欽此議得降革人員內有人去得者即行揀選帶領引

見外其中若有無知之人不肯實心効力行走不堪者降調之人交該部照伊所犯之罪加一倍治罪革職之人照伊所犯之罪加兩倍治罪如果勉力行走五年

無過令該管大臣等於伊等應陞之缺俾得列名

奏入於雍正十年八月二十日奉

旨依議

上諭穎俊懦弱兩營兵丁二千名欲其馬上嫻熟故給馬二百匹令其學習今聞穎俊懦弱兩營兵丁內有騎射可觀者亦有騎射雖屬生疎而馬上尚能發矢者以此看來則學習至一二年後馬上可以嫻熟矣八旗操演兵丁雖令學習步射鳥鎗走遠等技但滿洲兵丁以馬

上嫻熟為要著計八旗滿洲兵丁數目每十名給馬一匹即於旗下餵養官馬撥給俾兵丁等於馬上操演此所給官馬應令小心秣飼勿致損傷併將如何拴養之處著八旗操演兵丁大臣等會議具奏特諭

八旗操演兵丁大臣等議覆

皇上念八旗兵丁以馬上技藝緊要

賞給馬匹令其學習實於兵丁等大有裨益臣等查得八旗操演兵丁每旗需馬一百六十四匹八旗共需馬一

千二百八十匹合弘昇等操演兵丁二千名需馬二百匹共需馬一千四百八十匹應於各該旗拴養官馬內撥給此項馬匹係兵丁輪流騎用之馬臣等請於各營操練兵丁之官員頭目內擇其善於拴養者酌量每人分派二匹不等令其拴養臣等仍不時稽查如有不小心秣飼草率塞責以致損傷者即指名題叅治罪交兵部將此項馬匹於年底查明肥瘦據實奏

聞

奏入於雍正十年九月十六日奉

旨依議

正紅旗漢軍都統多羅貝勒弘春等以劉顯原管佐領前因壯丁甚少改為半分佐領後於均勻佐領時將內務府撥出壯丁補足作為一分整佐領今劉顯緣事革職無可承襲之人請將此佐領暫為公中佐領具奏奉

上諭朕從前因八旗漢軍佐領下壯丁多寡不均特降諭旨著令均勻當日辦理此事之大臣等均將世襲佐領之壯丁仍添入壯丁不足之世襲佐領內不應將公中佐領之壯丁添入世襲佐領之內正紅旗從前均勻壯丁時乃將內務府撥出之人添入劉顯原管佐領內甚屬錯謬八旗漢軍有似此辦理者俱著查明其壯丁不足之世襲佐領仍將世襲佐領之壯丁撥補量其壯丁之多寡或將兩姓合為一分佐領或將三姓合為一分

佐領令其輪流管理將來補授佐領亦易得人再公中
佐領之壯丁不足者仍將公中佐領之壯丁撥補著八
旗漢軍都統等公同詳查畫一辦理具奏特諭

八旗漢軍都統等議覆臣等伏思八旗原管佐領皆
係伊等屬下戶下壯丁編設者世管公中佐領乃係
另戶壯丁編設者其壯丁自與原管佐領下人等有
間若將世管公中佐領之壯丁撥入原管佐領內則
是另戶壯丁與屬下戶下之人無別而屬下戶下之

人竟為另戶壯丁矣揆諸情理實有未安臣等查八旗漢軍內佟世楹等二十一分佐領於雍正六年均勻壯丁時奏明不增不減現今此二十一分佐領原有屬下戶下現食錢糧之人俱足額數應遵原奏不增不減外其由內務府撥入之壯丁共計二百八十二名相應俱行撤出分給該旗之世管公中佐領內再正紅旗漢軍鄭安康佐領劉顯佐領原係兩箇半分佐領於雍正九年添入內務府壯丁一百二十九

名作為兩分整佐領今查鄭安康等佐領下除官兵外所有另戶戶下壯丁共六十六名相應遵

旨併為一分整佐領著鄭劉二姓輪流管理今佐領劉顯緣事革職應令現任佐領鄭安康管理日後缺出將兩姓人等列名補授此兩箇半分佐領內原有添入之內務府壯丁一百二十九名相應一併撤出作為一分公中佐領仍隸正紅旗以足三十分佐領之數再查正白旗孫紅桶等三分佐領正藍旗佟鑑等四

分佐領及甘士璉佐領共八分佐領俱係原管佐領
自應不增不減應將此八分佐領內撥出之壯丁一
併撤回仍隸原佐領下再此八分佐領內由世管公
中佐領下分入之壯丁及由內務府分入之壯丁及
佟世楹等二十一分佐領下應行撥出之壯丁等共
八百九十七名俱應撤出在伊等本旗佐領內均勻
分撥但正藍旗十一分原管佐領內應行撥出之壯
丁共計四百二十五名若止在本旗十九分佐領內

分撥則每佐領下所分壯丁似乎過多今查鑲白旗並無原管佐領亦無應撥之人相應將正藍旗應行撥出之壯丁即就近於鑲白旗正藍旗兩旗均勻分撥再此項應撥之壯丁內有現食錢糧者仍令其照舊當差統俟新撥佐領內缺出之日再行調回充補如此則原管世管公中佐領下之壯丁各有所歸不致混淆而補授佐領亦易得人矣恭候

命下之日臣等八旗漢軍一體欽遵辦理

奏入於雍正十年十二月十八日奉

旨依議

上諭朕看滿洲武舉武進士等於綠旗營不甚相宜若與綠旗官員一體擢用倘此內有人平常者不但於營務無益亦且壅滯伊等陞遷之路嗣後將滿洲武舉武進士如何補用及如何陞轉之處著兵部會同八旗都統等詳悉定議具奏特諭

兵部八旗都統等議覆查八旗滿洲蒙古武舉武進

士內騎射雖有可觀但於營務素未諳練若驟與營內官員一體擢用實於營務不宜且於伊等陞遷之處反致壅塞嗣後武舉武進士內有人材出眾騎射嫻熟者

皇上特恩選用外其餘滿洲蒙古考試中式武舉武進士俱交各該旗於伊等應得之缺補用但武舉武進士應補品級不同其陞用之處亦宜分別嗣後將滿洲蒙古考試中式武舉亦照漢人武舉例會試後由兵

部請

旨派大臣等驗看分別等次實係才優者列為頭等交該
旗視伊等中式年月名次於護軍校驍騎校等缺委
署試用行走三年若當差勤慎辦事明白者該旗都
統等即將伊等入於該旗應陞護軍校驍騎校人員
內一同帶領引

見恭候

欽定補授其騎射平常者列為二等駁回該旗令其學習

以圖會試上進伊等內有願在該旗當護軍前鋒効
力行走之人亦著挑取令其當差行走學習嫻熟時
遇揀選之年再令揀選補用再滿洲蒙古每武會試
之年止中式進士四名除

特旨挑選侍衛外其餘滿洲蒙古武進士交該旗於護軍
校驍騎校等缺亦視伊等中式年月名次補用行走
三年果於事務諳練勤慎稱職者遇應陞缺出該旗
都統將伊等入於該旗應陞人員內一同帶領引

見恭候

欽定補授再查滿洲蒙古武舉武進士既議以旗員補用
若係實授者自有應得之錢糧其委署者照副護軍
校副驍騎校例俾得錢糧米石伊等頂帶俱照委署
官員例如此則滿洲蒙古武舉武進士既獲陞階且
亦得以學習似屬有益再查從前所用內九門千總
現有十二人當差行走今將滿洲蒙古武舉武進士
既議以旗員補用應將現任滿洲門千總改補以令

畫一請將現任滿洲門千總交步軍統領詳加揀閱
分別等次出具考語咨送兵部帶領引

見伏候

欽定又查舊例內九門千總缺出以滿洲武舉補用外七
門千總缺出以漢軍武舉及漢軍旗下捐納人員補
用今既將滿洲武舉議以旗員補用請嗣後內九門
千總缺出亦照外七門千總例將漢軍武舉及漢軍
捐納人員補用至漢軍武進士舊例俱以營衛守備

補用仍照舊例遵行可也

奏入於雍正十年十二月二十日奉

旨依議

世宗憲皇帝上諭旗務議覆卷十

欽定四庫全書

世宗憲皇帝上諭旗務議覆卷十一

上諭八旗各佐領下俱有鐵匠鞍匠弓箭等匠每月給伊等錢糧俾充各項匠役者特欲其平時學習手藝以便行軍之際攜彼行走修理一應器械耳前因各項匠役雖存其實能製造者甚少而該旗大臣官員亦不甚稽查管教是以特交與武備院令其教習今聞伊等尚未學習遇有製造官物俱僱人代做僱覓一匠至費數人

錢糧且將每日應得飯錢一併給與所僱之人伊等身充匠役食國家廩餼乃不勤習技藝將所得錢糧不養贍家口而僱人代做俾身為廢物是何道理今伊等在家猶可僱人倘至軍前寧能僱人乎遇有官物製造立見其悞矣此甚為惡習公私俱屬無益皆由該管大臣官員等不以事務經心平時不行查管之所致也將此交與武備院及該管大臣等嗣後務行不時嚴察管教俾加緊學習其八旗作何特派官員會同監察監造官督

令學習俾製造不致有悞而僱人代作等弊可以永除之處著武備院會同都統等詳悉查議具奏至於各省駐防兵丁內亦有匠役京城匠役尚且如此諒各省匠役豈能親身製造著該將軍大臣等務行嚴加管教勒限一年令其加緊學習且試驗匠役手藝亦屬甚易朕差人試驗時倘仍有不能製造者必將該將軍大臣等一併治罪特諭

武備院會同八旗都統等議覆查雍正八年二月經

八旗都統等奏稱上三旗弓匠鍛匠鞍匠係武備院管轄俱能親身製造其下五旗弓匠能製造者少應勒限一年令其學習其銅匠應交興武備院學習其餘鍛匠鞍匠無所需用槩行裁革其八旗鐵匠內粗能製造者應分兩翼設立鐵廠令其製造鐵庫等處應造器械其不能製造者給限一年令其學習等因具奏准行在案今除八旗弓匠等各項匠役無庸議外查八旗鐵匠雖分兩翼設廠教習俱未能製造且

兩廠所有房屋俱不過二十餘間難將衆鐵匠齊集
教習應分左右翼各擇兩旗適中之地所有官房兩
旗合立一廠將鐵匠內有年老不能學習者即驗看
革退另行挑補令其學習伊等應用器械照從前兩
廠例置辦應需銀兩各於本旗房租內動用應需煤
炭由工部取用教習匠役不可無師應僱民間巧匠
令其教習其應給工價各於本旗房租內撥給匠役
學習手藝應勒限一年俟限滿粗能製造之時再勒

限一年令其學製各工程粗物及工部所用帳房椿
鋤等項如官物無多令私取舖內物件演習手藝至
於查看匠役祇派官員仍恐懈弛應兩翼各派副都
統一員令其總轄除兩翼現有之叅領二員外各旗
派官一員驍騎校二員令其專管此所派之大臣官
員應限以二年務令匠役俱至手藝學成然後一年
一換每年四季武備院派官稽查至歲底武備院會
同都統等詳加稽查如教至二年仍有不能製造之

匠役將該管官員即行叅奏如管教優者官員給與紀錄於應陞之處送名錄用如此則二年內匠役手藝俱可學成而僱人代做等弊亦可永除矣

奏入於雍正十一年九月初五日奉

旨此議甚屬詳盡依議

上諭聞得東華門西華門外所開酒舖甚多值班兵丁內之不肖者多進舖沽飲甚屬無益如何令其不賣與兵丁或作何嚴禁及派人查拏之處著莊親王及內務府

總管會同署步軍統領鄂善議奏特諭

莊親王允祿內務府總管會同署步軍統領鄂善議
覆我

皇上軫念值班兵丁

特沛隆恩賞給官飯於值宿之處賞給被褥茲又因兵丁
進鋪沽飲有虧伊等生計特降

諭旨此誠我

皇上愛養兵民之至意也臣等會議得

紫禁城內一應守衛之處關係緊要如兵丁飲酒進班於守衛及兵丁俱屬無益不可不嚴加禁止查

東華門西華門外所開飯舖內亦有兼賣酒者其特招人沽飲而開熱酒舖者亦甚多應交與都察院嚴行曉諭開酒舖民人將

東華門西華門外所有之熱酒舖一槩禁止令其別謀生理其飯舖亦止令其出賣飯肉菜蔬永行禁其賣酒臣等交與內外番役嚴行查拏如有犯者將飲酒

及賣酒之人俱照違禁例一體治罪如有值班而乘間私往別處沽飲者除將本人從重治罪外將該管人員一併議處俟

命下之日通行領侍衛內大臣八旗都統前鋒統領護軍統領都察院步軍統領內府佐領一體欽遵施行
奏入於雍正十一年十二月二十四日奉

旨依議

世宗憲皇帝上諭旗務議覆卷十一

欽定四庫全書

世宗憲皇帝上諭旗務議覆卷十二

上諭恭逢

列祖忌辰在京則由禮部等衙門在外則由督撫提鎮及各府州縣懸牌出示曉諭官兵兵民人等一體凜遵齋戒定例相沿日久朕思懸牌出示將

列祖廟號直書於上其懸示之地未必悉能潔淨而出入往來行人雜遝坐卧喧嘩均非敬謹恪恭之意嗣後應如

何通行曉諭使衆共知而又不至於褻慢著該部悉心
妥議定例奏聞特諭

禮部議覆臣等恭閱

列祖忌辰定例所載

大內以下宗室以上不報祭不還愿不宴會不作樂文
武官員軍民人等俱穿素服不理刑名照常辦事等
語在京由臣部行文知會各衙門出示部前及九門
在外文武大小衙門掛牌通行曉諭但牌示之地皆

不潔淨在往來人等不無坐卧喧嘩今欽奉

諭旨嗣後應如何通行曉諭使衆共知而又不至於褻慢
令臣等悉心妥議定例奏聞仰見我

皇上至仁大孝慎重周詳之盛心臣等敬謹詳議嗣後恭
逢

列祖忌辰在京仍由臣部知會八旗各部院衙門其軍民人
等歷來由臣部於大門外並九門前張掛告示通行
曉諭原係書寫某月某日此一日不報祭不還愿不

宴會不作樂穿素服等語但恐出示之地未能潔淨
今伏請恭製龍邊粉油木牌照例敬謹書寫儆齋戒
牌規例設案安設於臣部大門前派司員衙役敬謹
看護其九門各擇潔淨寺廟設案安設於大門前通
行曉諭設立之日令九門提督派撥衙役看護禁止
閒雜人等坐卧喧嘩次日將牌繳送臣部敬謹貯庫
如該管官不加意督令巡查怠忽從事致有褻慢者
查出指名叅處其直省文武大小衙門亦令遵照在

京之例書寫安設牌案曉諭務須潔淨嚴肅至鄉村
人民應令地方官責令約正值月嚴行曉諭如此則
國家敦本追遠之大典普天率土咸得聞知各加敬謹
而亦不至有褻慢之處恭候

命下之日永為定例行令八旗各部院衙門直省督撫將
軍提鎮轉行所屬一體遵奉施行

奏入於雍正十二年七月初二日奉

旨依議

宗人府將正黃旗間散覺羅等賭博一案定擬具奏
奉

上諭此案內將賭博之覺羅圖爾禪等既擬以枷責拘禁
又議以罰錢糧一年此等獲罪之覺羅等寧復與以錢
糧乎前者豐盛額亦曾奏請將伊該旗革職之覺羅等
裁革錢糧等語著一併交宗人府將從前如何議定之
處查明再行定議具奏特諭

宗人府議覆查八旗間散宗室年歲已滿係臣衙門

照例行知該旗給與錢糧有犯罪拘禁者即行知該旗將錢糧裁革外其或實係貧乏不能自贍者視伊之族長等出具保結將其一子准照孤子之例不俟歲滿照例給與錢糧惟八旗覺羅等錢糧俱係各該旗辦理是以彼此互異無一定之例伏思覺羅與宗室原屬一體嗣後無罪引退之覺羅官員等仍照常給與二兩錢糧外凡獲罪革職之覺羅及獲罪應拘禁之間散覺羅等一槩不准給與錢糧其中實係貧乏不

能自贍者視其族長等具結呈明奏

聞請

旨亦照宗室之例准其一子不俟歲滿給與錢糧其從前
革職仍食閒散覺羅錢糧之人交與八旗逐一查明
盡行裁革照現在所擬之例遵行俟

命下之日通行八旗永為定例

奏入於雍正十二年十一月十七日奉

旨依議

世宗憲皇帝上諭旗務議覆卷十二